

## MORGAN, Syr CHARLES (1575? - 1643?), milwr

**Enw:** Charles Morgan  
**Dyddiad geni:** 1575?  
**Dyddiad marw:** 1643?  
**Priod:** Elizabeth Morgan (née de Marnix de Sainte Aldegonde)  
**Plentyn:** Ann Morgan (née Morgan)  
**Rhiant:** Frances Morgan (née Leigh)  
**Rhiant:** Edward Morgan  
**Rhyw:** Gwryw  
**Galwedigaeth:** milwr  
**Maes gweithgaredd:** Milwrol  
**Awdur:** Arthur Herbert Dodd

pedwerydd mab Edward Morgan (1530 - 1585), Pencarn, sir Fynwy, a Frances Leigh, Llundain. Cangen iau o deulu [Morganiaid](#) Tredegar oedd ei deulu - yr oeddent wedi cael Pencarn trwy briodas hendaidd Charles. Dilynodd dueddiadau milwrol ei ewythr, [Syr Thomas Morgan](#) 'the Warrior' (bu farw 1595) a'i frawd hyn, Syr Mathew Morgan (a gafodd ei wneuthur yn farchog gan [Iarll Essex](#) yn Rouen, 1591, ac a fu'n aelod seneddol dros Aberhonddu, 1593), a bu'n gwasnaethu yn Fflandrys, yna fel capten yng nghyrch [Essex](#) ar Cadiz, 1596, lle yr oedd ei frawd Syr Matthew yn 'lieutenant-colonel,' ac yn Ostend yn 1601. Yr oedd cymaint o anffodlonrwydd gwleidyddol a chymaint o Babyddion yn ei deulu ac ymhlith ei berthynasau (yn eu mysg yr oedd ei fam, ewythr, brawd, brawd-yng-nghyfraith, a llawer o 'allies and tenants') nes peri i rai pobl obeithio y byddai iddo arwain llw arfog yn erbyn Iago I pan ddeuai hwnnw i'r orsedd, eithr gwrthododd; ac yn wobwr, gwnaethpwyd ef yn farchog (23 Gorffennaf 1603). Yna aeth yn ôl i Ostend hyd nes cwmpodd y lle hwnnw i ddwylo Spinola (20 Medi 1604); daeth adref yr adeg honno ac fe'i gwnaethpwyd yn ustus heddwch. Wedi i derfysgoedd y 'Pabyddion' dorri (Mai 1605) yn Swydd Henffordd a De Cymru - dywedwyd fod ei frawd-yng-nghyfraith Rice ap Price yn arweinydd yn y terfysgoedd - cafodd ei garcharu yng ngharchar y Fleet am 'neglecting his place' a dianc i Lundain 'in a time of such disorder,' eithr yn ddiweddarach bu'n helpu i ddod â'r ardaloedd hynny i drefn. Pan ddaeth yr heddwch â'r Is-Ellymyn i'w derfyn yn 1620 aeth allan gyda llw gwirfoddolwyr Syr Horace Vere (hen gyd-filwr), yr oedd yn ben ar lu Prydain yn Bergen hyd 1622, a bu'n helpu i amddiffyn Breda, 1625. Y flwyddyn ddilynol, gydag arian a gafwyd yn fenthyg gan [Syr Thomas Myddelton](#) ac eraill, arweiniodd lu Prydeinig i helpu brenin Denmarc ar rannau isaf afon Elbe, ond er cael cymorth y llynges gan [Syr Sackville Trevor](#) (gweler o dan [Trevor](#), Trevalun) a gweithredu gydag ynni a defnyddio pob math o foddion wrth geisio cadw ynghyd llw arfog nad oedd yn derbyn yr adnoddau a ddylai gael, bu raid iddo ildio Staden i Tilly yn 1628. Erbyn 1629 yr oedd yn ei ôl yn Holland eithr yn treulio'r blynyddoedd mewn ofn yn wastad rhag cael ei gymryd i'r ddalfa gan yr echwynwyr a oedd wedi darparu adnoddau i'w fyddinoedd yn ystod cyrch Staden. Bu'n cynorthwyo yng ngwarchae Breda (Awst 1637), ac yn y diwedd daeth, fel ei ewythr '[the Warrior](#),' yn llywiawdwr Bergen. Mor ddiweddar â 1642 yr oedd yn gofyn caniatâd, gartref, i gasglu dynion ynghyd i lenwi lleoedd gwag yng nghwmni un o'i gapteniaid Cymreig. Ychydig wedi hynny bu farw 'this honest and brave captain' (fel y'i galwyd gan [Iarll Essex](#)) a chladdwyd ef yn Delft. Pan oedd ar y Cyfandir priodasai Elisabeth, merch Philip de Marnix de Ste. Aldegonde (bu farw 1598), arglwydd Belgaid a Phrotestant, a chydweithiwr â William o Orange yng Ngwrthryfel yr Iseldiroedd. Daeth eu hunig ferch, ANN MORGAN (bu farw 1687), adref a phriododd (1), Syr Lewis Morgan, Rhiwperra, sir Fynwy (aelod seneddol dros Gaerdydd, 1628; gwnaethpwyd ef yn farchog, 1629, a bu farw 1635); (2), Walter Strickland,, aelod o 'Council of State' Cromwell a'r 'Other House'; a (3) John Milborne, Wonaston, sir Fynwy. Daeth Ann yn ddinesydd Prydeinig ar 18 Chwefror 1651. Daeth i feddu tiroedd yn sir Fynwy a phriododd ei merched â theuluoedd o'r rhan honno o'r wlad. Eithr pan fu farw yn Chelsea yn 1687 gofynnodd am gael ei chladdu yn Delft.

### Awdur

Yr Athro Emeritus Arthur Herbert Dodd, (1891 - 1975)

### Ffynonellau

*Oxford Dictionary of National Biography*, xxxix, 13-4, a'r ffynonellau a enwir yno

G. T. Clark, *Limbus Patrum Morganiae et Glamorganiae* (1886), 310, 319-20, 326-7

*Reports of the Historical Manuscripts Commission*, 5th R., 75, Cecil, vi, 165, 205, 361; xi, 291 xvi, 207; xvii, 235; Cowper, i, 309, 311, 340, 378, 391, 448; ii, 28, 34-5

*The Journals of the House of Lords*, v, 7

*Acts of the Privy Council of England* (1626) 483, (1627) 229-30, 421

Rushworth, *Historical Collections of Private Passages of State* (1721), i, 421, 637

Bradney, i, 381; ii, 123

*Trafodion Anrhydeddus Gymdeithas y Cymmrodorion*, 1937, 213, 222; 1945, 17, 35-6

## Dolenni Ychwanegol

Wikidata: [Q18730079](https://www.wikidata.org/wiki/Q18730079)

Dyddiad cyhoeddi: 1953

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

